



Kristo Hufundisha Mambo ya Mbinguni

Ee Bwana, unifundishe njia yako; Nitakwenda katika kweli yako; Moyo wangu na ufurahi kulicha jina lako.—**Zaburi 86:11.**

Kile ambacho katika mashauri ya mbinguni Baba na Mwana waliona kuwa ni muhimu kwa ajili ya wokovu wa mwanadamu kimefunuliwa kwa uwazi kabisa katika Maandiko Matakatifu. Kweli zisizo na kikomo za wokovu zimeelezwa kwa uwazi sana kiasi kwamba viumbe wenye ukomo wanaotamani kujua ukweli hawawezi kushindwa kuuelewa. Mafunuo ya Mungu yametolewa kwa ajili ya kuwafundisha katika haki, ili waweze kumtukuza Mungu na kuwasaidia wanadamu wenzao.

Kweli hizi zinapatikana katika Neno la Mungu—lililo kiwango ambacho kwacho tunatofautisha kati ya wema na ubaya. Utii kwa Neno hili ndiyo ngao bora kwa vijana dhidi ya majaribu ambayo wanakabiliana nayo wakati wa kujipatia elimu. Kutoka kwenye Neno hili wanajifunza namna ya kumheshimu Mungu, na jinsi ya kuwa waaminifu kwa wanadamu, kwa furaha wakitimiza majukumu na kukabiliana na majaribio yanayowajia kila siku, na kubeba mizigo yake kwa ujasiri.

Kristo, Mwalimu Mkuu, alitafuta kujipatia akili za watu katika kutafakari juu ya mambo ya kidunia, ili Apate kuwafundisha mambo ya mbinguni. Kama walimu wa zama Zake wangekuwa tayari kufundishwa Naye, kama wangeungana Naye katika kupanda mbegu za kweli ulimwenguni, ulimwengu ungekuwa tofauti sana na ulivyo sasa. Laiti waandishi na Mafarisayo wangeunganisha nguvu zao pamoja na Mwokozi, maarifa ya kumjua Kristo yangerudisha sura ya maadili ya Mungu katika nafsi zao.

Lakini viongozi wa Israeli waligeuka kutoka kwenye chemchemi ya elimu ya kweli. Walisoma Maandiko ili tu kudumisha mapokeo yao na kulazimisha maadhimisho yao yaliyotengenezwa na wanadamu. Kwa tafsiri zao wenyewe waliyafanya kuwa mawazo dhahiri ambayo Mungu hakuyatoa kamwe. Uundaji wao wa sirisiri ulikifanya kuwa kisicho dhahiri kile Mungu alichokiweka wazi. Walibishana juu ya Neno, na kwa hila wakaukataa ukweli muhimu mno. Neno la Mungu likapokonywa nguvu yake, na roho za uovu zikaongoza mapenzi yao.

Maneno ya Yesu hayana chochote ambacho si cha lazima. Mahubiri ya Mlimani ni mafundisho ya ajabu, lakini ni rahisi sana kiasi kwamba mtoto anaweza kujifunza na kuyaelewa bila kupotoshwa. Mlima wa baraka ni alama ya kilele cha kiroho ambacho juu yake Kristo aliwahi kusimama. Kila neno Alilolisema lilitoka kwa Mungu, na aliongea kwa mamlaka ya mbinguni. “Maneno hayo nliyowaambia ni roho, tena ni uzima” (Yohana 6:63). Mafundisho Yake yamejaa ukweli unaoadilisha, unaookoa, ambao matamania ya juu zaidi ya wanadamu na uchunguzi wa kina haviwezi kulinganishwa nao. Alikuwa akiuelewa uharibifu mkubwa uliokuwa tishio kwa jamii ya wanadamu, na Alikuwa ili aziokoe roho kwa haki Yake mwenyewe, akiuletea ulimwengu dhamana dhahiri ya matumaini na faraja kamilifu (Counsels to Parents, Teachers, and Students, 438, 439).